

JAMHURI YA MUUNGANO WA TANZANIA

WIZARA YA AFYA

Telegram "AFYA", **DODOMA**
Namba ya Simu: +255 26 2323267
Nukushi No: +255 22 2138060
Barua pepe; ps@afya.go.tz



Mji wa Serikali – Mtumba,
Barabara ya Afya,
S.L.P 743
40478, DODOMA

TAARIFA KWA VYOMBO VYA HABARI

SERIKALI YA TANZANIA YAWEKA MWELEKEO MPYA WA KIHISTORIA KATIKA UJENZI WA VIWANDA VYA DAWA

Dar es Salaam, 23 Desemba 2025.

Serikali ya Jamhuri ya Muungano wa Tanzania imetangaza rasmi mwelekeo mpya wa kimkakati wa kuharakisha ujenzi wa viwanda vya dawa na bidhaa za afya nchini, kwa lengo la kuimarisha usalama wa afya wa Taifa, kupunguza utegemezi wa uagizaji wa dawa, na kuiweka Tanzania kwenye ramani ya uzalishaji wa dawa barani Afrika na duniani.

Akizungumza leo katika kikao cha wazalishaji wa dawa na bidhaa za afya nchini, Waziri wa Afya amesema kuwa ujenzi wa viwanda vya dawa si mpango wa majaribio bali ni uamuzi wa kimkakati uliokwishaamuliwa na Serikali.

“Ujenzi wa viwanda vya dawa nchini Tanzania si jaribio—ni mwelekeo wa kimkakati uliokwishaamuliwa na Serikali,” amesema Waziri Mchengerwa.

Waziri mchengerwa amesisitiza kuwa usalama wa afya wa Taifa hauwezi kujengwa kwa kutegemea uagizaji wa dawa pekee, bali unahitaji uzalishaji wa ndani unaokidhi viwango vya kimataifa, hususan WHO-GMP.

“WHO-GMP si anasa wala cheti cha mapambo—ni pasipoti ya kuingia sokoni kimataifa,” amesisitiza.

Katika hotuba hiyo, Waziri ameweka wazi kuwa changamoto ya Tanzania katika biashara ya kimataifa ya dawa si ukosefu wa soko, wataalamu au fursa, bali ni viwango. Akinukuu takwimu za hivi karibuni, amesema kuwa mwaka 2023 Tanzania iliuzwa dawa nje ya nchi chini ya dola milioni 1, ikilinganishwa na Kenya iliyouza zaidi ya dola milioni 140.

“Hili si tatizo la soko—ni tatizo la viwango,” amesema Waziri Mchengerwa.

Uharakishaji wa Uwekezaji na Mfumo wa Green-Lane

Serikali imeeleza kuwa tayari imeanzisha mfumo maalum wa uharakishaji wa uwekezaji kupitia **Green-Lane Approval System**, unaotekelezwa chini ya **Pharmaceutical Investment Acceleration Programme**, pamoja na kuunda **Pharmaceutical Investment Acceleration Taskforce (PIAT)** yenye mamlaka ya kufanya maamuzi ya haraka na kuratibu uwekezaji wa kimkakati katika sekta ya dawa.

“Tumeondoa urasimu wa maamuzi ya mizunguko mirefu. Mwekezaji mwenye nia ya dhati atapata majibu ya haraka, ya wazi na yanayotabirika,” amesema Waziri Mchengera.

Katika muktadha huo, Serikali imetangaza kuwa **Tangazo la Expression of Interest (EOI)** kwa ajili ya uwekezaji katika uzalishaji wa dawa na bidhaa za afya tayari limetolewa rasmi, likiwa na lengo la kuvutia wawekezaji wa ndani na wa kimataifa, kuhamasisha ubia wa kimkakati, na kuharakisha kufikiwa kwa viwango vya kimataifa. Mwisho wa kuwasilisha maombi ya EOI umetajwa kuwa ni **tarehe 2 Machi 2026**.

Ujumbe kwa Wazalishaji wa Ndani na Waingizaji

Waziri ametoa wito kwa wazalishaji wa ndani kuwekeza katika ubora, teknolojia na mifumo ya viwango, akisisitiza kuwa msaada wa Serikali utaelekezwa kwa viwanda vinavyokidhi au vinavyoonesha mpango wa wazi wa kufikia viwango vya kimataifa.

“Hatutalinda uzalishaji kwa sababu ni wa ndani pekee, bali tutalinda uzalishaji wenye ubora unaokidhi viwango vya dunia,” amesema Waziri Mchengera.

Aidha, ametoa onyo kali dhidi ya jitihada zozote za kuhujumu au kuchelewesha kwa makusudi ajenda ya industrialization ya sekta ya dawa, akisisitiza kuwa hii ni agenda ya Taifa, si ya kikundi fulani.

Kwa waingizaji wa dawa, Waziri amesema mabadiliko haya si tishio bali ni fursa ya kuingia katika uzalishaji wa ndani kupitia ubia, uhamishaji wa teknolojia na uwekezaji wa muda mrefu.

Wito kwa Wawekezaji na Taasisi za Fedha

Serikali imewahimiza wawekezaji wa ndani na wa kimataifa, pamoja na taasisi za kifedha, kuchukua fursa ya uwekezaji katika viwanda vya dawa, ikieleza kuwa sekta hiyo ina soko linalokua, mahitaji makubwa, na uungwaji mkono wa sera katika ngazi ya juu kabisa ya Serikali.

“Kuwekeza katika viwanda vya dawa ni kuwekeza katika afya ya wananchi, uthabiti wa Taifa, na ukuaji endelevu wa uchumi,” amesema Waziri Mchengerwa.

Akihitimisha, Waziri Mchengerwa amesema Tanzania iko tayari kuwa kitovu cha uzalishaji wa dawa barani Afrika, akisisitiza kuwa mwelekeo wa sera uko wazi, soko lipo, na wakati wa kuamua ni sasa.

“Soko lipo. Mahitaji yapo. Serikali iko tayari. Wakati wa kuamua ni sasa,” amehitimisha.

Imetolewa na



John Mapepele

Mkuu wa Kitengo cha Mawasiliano Serikalini

WIZARA YA AFYA